

四庫全書

子部

欽定四庫全書

子部  
山堂肆考卷二十一

詳校官中書臣孫溶

主事臣祁韻士覆勘

總校官降調編修臣倉聖脉

校對官主事臣陳墉

謄錄監生臣龐兆懋

欽定四庫全書

山堂肆考卷二十

明 彭大翼 撰

地理

海

博物志天地四方皆與海水相通地在其中蓋無幾也四海之外皆復有海東海之別有渤海溟海員海通謂之滄海南海之別有漲海西海之別有蒲昌海蒲類海青海鹿渾海陽池海北海之別有瀚海瀚海

之南有渤鞮海伊連海凡四海通謂之裨海裨海外復有大瀛海環之又海曰朝夕池一云天池一云大壑海神曰海若

善下

老子曰江海所以能為百谷王者以其善下之也

引晦

劉熙釋名海晦也主引晦濁其水黑而晦也

地脈

關令內傳天有五億五萬五千五百五十里地亦如之  
各以四海為脈

地紀

文選地以四海為紀

浮天

木玄虛海賦於廓靈海長為委輸其為狀也則乃泔澗  
澈灑浮天無岸沖融沆瀣渺瀰淡漫波如連山乍合乍  
散噓喻百川洗滌淮漢襄陽廣鳥膠瀉浩汗木華字玄

虛晉人

浴日

柳元宗文今夫大海其東無東其西無西其北無北其南無南旦則浴日而西之夜則滔列星涵太陰揚陰火珠寶之光以明而塵霾之雜不處也

品物類生

木玄虛賦其為器也包乾之奧括坤之區惟神是宅亦祇是廬何竒不育何怪不儲茫茫積流含形內虛曠哉

坎德卑以自居弘往納來以宗以都品物類生何有何  
無

流波相薄

莊子曰海水三歲一周流波相薄即為之地動

蓬嶼

李顥凌僊賦瞻蓬萊之秀嶼冀東叟之可尋將乍至而  
反墜患巨浪之相臨

桑田

葛洪神僊傳麻姑謂王方平曰自接待以來見東海三變為桑田向到蓬萊水乃淺於往者畧相半也豈復將為陵谷乎方平乃曰東海行復揚塵耳

鮫室

木玄虛賦其垠則有天琛水怪鮫人之室按北夢瑣言鮫人泉客織鮫綃帕於水室賣與人間昔張建章為幽城司馬曾以府命行渤海遇水僊遺鮫綃帕夏月溽暑展帕滿堂凜然



蜃樓

漢書海傍有蜃氣為樓臺之狀

海不揚波

周成王時越裳氏重譯來朝譯曰吾受命吾國之黃耆  
天無烈風淫雨海不揚波三年矣意者中國有聖人乎  
蓋往朝之按越裳在交趾之南阮昌齡作海不揚波賦  
其畧云收碣石之宿霧斂蒼梧之夕雲八月靈槎泛寒  
光而靜去三山神闕湛清影以逍遙

海不擇流

秦李斯曰泰山不讓土壤故能成其大河海不擇細流故能就其深

出雲雨

公羊傳海千里潤注云海出雲雨及千里也

受露霧

孫卿子曰海受露霧故能成其深

百川學

揚子法言百川學海而至於海丘陵學山而不至於山  
萬川歸

莊子曰北海若謂河伯曰天下之水莫大於海萬川歸  
之不知何時止而不盈尾閭泄之不知何時已而不虛  
列子曰渤海之東有大壑焉實惟無底之谷名曰歸墟  
八紘九野之水天漢之流莫不注之而無增無減焉注  
云歸墟即尾閭也

三神山

博物志滄海之中有蓬萊方丈瀛洲三神山以金銀為宮闕僊人所集也

九老都

十洲記滄海島中有紫石宮室九老僊都

弗溢弗損

莊子曰東海之鼈語埒井之蛙曰夫海千里之遠不足以舉其大千仞之高不足以極其深禹之時十年九潦而水弗加溢湯之時八年七旱而涯不加損此東海之

大樂也

不滿不竭

莊子曰諄芒遇苑風於大海之濱苑風曰子將奚之曰將之大壑大壑之為物也注焉而不滿酌焉而不竭

迴地軸

隋楊師道望海詩洪波迴地軸孤嶼映雲光落日驚濤上浮天駭浪長僊臺隱螭駕水府汎鼉梁碣石朝烟滅之采歸鴈翔

浹天虛

宋吳淑海賦浹天虛而浮析木薄碣石而蕩之梁

審知招商

六帖王審知欲招蠻夷商賈海上波濤為阻一夕風雨  
雷電震擊開以為港閩人以為審知德政所致號為甘  
棠港

王勃省父

唐王勃父福時由雍州參軍遷交趾令勃往省父渡海

溺水而卒

乘桴浮海

漢應邵風俗通姜肱字伯淮靈帝踐祚徵肱為太守肱告人曰吾以虛獲實蘊藉聲價盛明之際尚不委質今政在私門夫何為哉遂乘桴浮於海莫知其極

抱板泛海

隋封德彝之少也僕射楊素竒之妻以姪女常撫座曰封郎必居此座後德彝討遼東舟沒衆謂必死素曰封

金匱要略卷二十  
郎當得僕射未必死求之封因抱一板泛海中力盡欲  
放忽憶楊公言勉力持之胸前為板所摩肉破至骨衆  
救得免後官果至僕射

### 齊景樂治

說苑齊景公遊海上而樂之六月不歸告左右曰敢言  
先歸者死顏蠲進曰君樂治海不樂治國彼若有治國  
者君安能樂此海乎遂歸至中道聞國人謀將不納之  
盧敖窮觀



淮南子曰盧敖遊於北海經乎太陰入乎玄關至於蒙  
穀之上見一士焉深目而玄鬚淚注而鳶肩豐上而殺  
下方捲龜殼而食蛤蜊敖就與之語曰唯敖為背羣離  
黨窮觀於六合之外周行四極唯北陰之未窺子殆可  
與敖為友乎若士者蓋然而嘆曰嘻我南遊乎罔畏之  
野北息乎沈墨之鄉西窮宵冥之黨東開鴻濛之光此  
其下無地而上無天聽焉無聞視焉無眴今子遊始於  
此乃語窮觀豈不遠哉然子處矣吾與汗漫期於九垓

之外乃舉臂而竦身遂入雲中按教燕人秦始皇名為  
博士使求神僊亡而不返汗漫無紀極也九垓九天也

徐福尋僊

徐福字君房秦始皇遣福及童男女二千人入海尋神  
僊不返唐開元中有人於海中見之

陳茂罵神

謝承後漢書汝南陳茂嘗為交趾別駕刺史周敞涉海  
遇風船欲覆沒茂拔劍呵罵水神風即息

海中紅旗

宋趙鼎謫朱崖自雷州浮海而南顧見洪濤間紅旗靡靡相逐而下疑為海寇或外國兵甲呼問舟人舟人搖手令勿語恐怖之色可掬急入舟被髮持刀出篷背立割其舌出血滴水中戒使臣閉目坐船內凡經兩時頃聞舟人相呼曰更生更生乃言曰朝來所見蓋巨鱷也平生未嘗覩所謂紅旗者此耳

海中陰火

嶺表錄異海中取魚蜃置陰處有光初見以為怪推其  
義蓋鹹水所生凡海中水遇陰晦波如燃火滿海以物  
擊之迸散如星有月即不復見木玄虛賦陰火潜燃豈  
謂是乎

過海思愆

周景式孝子傳管寧字幼安避地遼東過海遇風船人  
危懼皆悔過寧思惟咎愆念昔年嘗如廁不冠而已向  
天叩頭風亦尋息

入海留語

唐讓皇帝穆宗親兄不為太后所愛故穆宗越次而立讓皇不肯臣穆宗遂造船入海不知其處臨入海時留語四句今刻在玉碑上云小山壓大山大山全無氣羞見本邦人將身投外裔

煮石濟饑

晉書鮑靚為南海太守行部過海遇風饑甚取白石煮食之以濟按靚女為葛洪妻善灸贅疣

鑿石開道

北夢瑣言交趾以北距南海有水路多覆舟高駢往視之乃有橫石隱在水中因奏以開鑿海道之利詔聽之乃召工者啖以厚利竟去其石至今賴之

翻岸倒雲

濱海之人遠望海水似高於地有如岸焉蓋水氣也故隋煬帝望海詩遠水翻如岸遙山倒似雲

積流疏派

唐太宗望海詩積流橫地紀疏派引天潢僊氣疑三嶺  
和風扇八荒拂潮雲布色穿浪日舒光照岸花分彩迷  
雲鴈斷行

馬銜當蹊

玄虛賦若其負穢臨深虛誓愆期則有海童邀路馬銜  
當蹊天吳乍見而鬚髯蝸象暫曉而閃屍注云海童馬  
銜並海中神怪

精衛填石

見山發鳩山

慕容征郭

王隱晉書慕容晃上言曰正月十三日臣躬征郭遠假  
陛下天地之威將士竭命精誠感格海為結冰凌行海  
中三百餘里臣及諸老言自立國以來無海水冰凍之  
歲風俗通曰積冰曰凌冰壯曰凍

希堯使吳

五代史段希堯使吳越過海遭大風左右皆恐怖希堯



曰吾平生不欺汝等恃吾可無恐也已而風止

色如爛椹

杜陽雜編南昌國有紫海水色如爛椹可以染衣其魚  
龍龜鼈沙石草木無不紫者又十洲記東有碧海廣狹  
與東海等水鹹苦正碧色

氣如圓窰

晉書東海氣如圓窰窰宏濶貌與崢嶸同今絹畫在竹  
格曰窰又海船渡海須當候氣見黃氣知有人烟國土

見白氣知有山峯巖壑見黑氣則水也

沙門島

沙門島在登州府城西六十里海中凡海舟渡遼者必泊此以避風宋時嘗流放罪人於此其巖磯牽牛大竹小竹四島皆與此島相連屬紫翠巉絕出沒波濤中真神僊所宅也上生白芝又多美石見蘇軾北海十二石記

海門島

海門島在通州南四十里海中宋長編國初犯死獲貸者多配隸於海門島有屯兵使者領護之

### 海運

宋季有海盜朱清者嘗為富家傭殺其主亡入海島與其徒張瑄乘舟抄掠海上備知海道曲折尋就招懷為防海義民元伯顏平宋時遣清等載宋庫藏諸物從海道入京師授金符千戶二人遂言海道可通乃命總管羅璧暨瑄等造船六十艘運糧四萬六千餘石入京師

然創行海洋亦逾年始至朝廷不知其利仍通舊運尋因忙兀斛言海運為便遂立萬戶府四總其事又併四府為都漕運萬戶府命清瑄二人掌之至成宗大德六年二人被江南僧石祖進撫其交番不法等事伏誅按輟耕錄引杜工部出塞詩漁陽豪俠地擊鼓吹笙竽雲帆轉遼海粳稻來東吳昔遊詩幽燕盛用武供給亦勞哉吳門持粟帛泛海凌蓬萊觀此二詩則唐時已有海運朱張特舉行之耳朱張皆揚州府通州人

海市

登州府四面皆海春夏時遙見水面有城郭市肆人馬  
往來若交易狀土人謂之海市蘇東坡云予聞登州海市舊  
矣常以不見為恨乃禱於海神廟明日果見之有詩云  
東方雲海空復空羣僊出沒空明中蕩搖浮世生萬象  
豈有貝闕藏珠宮心知所見皆幻影敢以耳目煩神工  
歲寒水冷天地閉為我起蟄鞭魚龍重樓翠阜出霜曉  
異事驚倒百歲翁

海溢

海溢一曰海嘯東漢質帝本初元年夏四月海水溢桓  
帝永康元年八月海溢靈帝建寧四年二月海溢梁武  
帝普通元年江淮海溢唐高宗顯慶元年九月括州大  
風海溢總章二年九月大風海溢漂沒六千餘家宋元  
豐四年七月甲午夜靜海海門大風雨沿海官私廬舍  
漂沒二千七百三十有六元大德五年暴風江海水大  
溢高四五丈崇明通泰真州沿江之地被災者三萬四

千八百餘戶皇慶二年八月崇明州大風海溢泰定三年十一月崇明海門等處海溢至正元年通泰等州海溢溺死一千六百餘人

海乾

唐道士葉靜能有白衣老父泣拜曰被胡僧來呪海水十涸七八靜能使朱衣人執黃符往投之海水復舊老父乃龍也

海眼

唐金華子北海縣因發地得五銖錢取之不盡中得一石記云此是海眼以錢鎮之衆懼復掩之

海影

酉陽雜俎海影翻側言影倒懸也

江

釋名江者公也諸水流入其中所公共也禹貢三江既入震澤底定注云松江下七十里分流東北入海者為婁江東南流者為東江併松江為三江或云岷



山為大江至九江為中江至徐陵江為北江蓋一源而三目也周禮職方氏東南曰揚州其川三江三江者東行至揚州復分為三道而入海故揚州有三江也蜀之三江則外水岷江中水涪江內水沱江也禹貢九江孔殷九江即今之洞庭在長沙下雋西北今沅水漸水元水辰水叙水酉水澧水資水湘水皆合於洞庭是也潯陽記九江一烏白江二蟬江三烏土江四嘉靡江五猷江六浮江七廩江八提江九茵江

是也枚乘七發觀廣陵之曲江今揚州是也始興郡  
有曲江今韶州是也廣雅江神謂之奇相

龍負舟

呂氏春秋大禹南省方濟江黃龍負舟

鼃為梁

紀年周穆王東巡至九江叱鼃鼃以為梁

得萍實

家語楚昭王渡江有物大如斗圓而赤直觸王舟舟人

取之王大怪使人之魯問孔子孔子曰此萍實也可剖而食之吉惟霸者能獲之使返王遽食之甚美

採菱華

傅玄歌有女殊代生涉江採菱華又郭璞江賦水物怪錯則有玉珧海月土肉石華

弔屈

揚雄字子雲成都人其作書往往摭離騷而反之自岷投諸江流以弔屈原

罵胥

漢書吳郡王闕渡錢塘江遭風船欲覆闕拔劍砍水罵  
伍子胥風遂息得濟

鼓楫過江

漢建初中張禹拜揚州刺史過江行部中土人皆以江  
有子胥之神難於濟涉禹厲聲言曰子胥如有靈知吾  
志在理察冤獄豈危我哉遂鼓楫而過郡邑幽深之處  
莫不畢到

擊楫渡江

晉祖逖為奮威將軍北渡江中流擊楫而誓曰不清中原而復濟者有如此江

龍門

龍門江在安南嘉興州蒙縣源出雲南寧遠州至此橫截江流中分三道飛湍聲聞百里傍有穴多出鸚鵡魚色青綠口曲似鸚鵡嘴

馬湖

馬湖江在叙州府城南源出沈黎實大度之支流也亦名瀘水一名金沙江諸葛亮渡瀘即此江之上流也

濫觴

家語江水始出岷山其源可以濫觴及其至於江津不方舟不避風不可以涉

紫帶

袁崧宜都記對西陵南岸有山其峯最孤秀人自山南上至頂俯臨大江如紫帶視舟船如鳧雁

待符

楚昭王出遊留夫人貞姜於漸臺江水大至遣使者迎  
夫人忘持符夫人曰王與宮人約召必以符今使者不  
持符妾不敢行於是使者返取符還臺已壞夫人沈水  
而死

解珮

韓詩外傳昔鄭交甫遊於江漢過漢臯遇二女妖服珮  
兩珠如荆雞卵交甫與言曰願請子之珮二女解珮與

交甫懷之去十步探懷中則亡矣回顧二女亦不見相  
傳沔陽州城西四十里瀕漢江范溉市即交甫遇二女  
處或曰二女即湘妃

吐貝

春秋運斗樞瑤光得則江吐大貝

泣珠

吳都賦泉客慷慨而泣珠

水出涑山



山海經岷山東北百三十里為岷山江水出焉又東北五十里為岨山江水出焉東流注於大江

水流潯陽

郭璞江賦分二源於岨岨流九派於潯陽

學字

四川保寧府有巴江源出大巴山至巴縣東南分為三流而中央橫貫勢若巴字流二十里合清水江至合州與嘉陵江合又名字江唐李遠詩杜宇呼名語巴江學

字流

投書

蕭方等三十國春秋光祿勳殷羨之字洪喬為豫章太守將行都下貴游因寄書百餘函羨之行至石頭板橋投書於江曰沈者自沈浮者自浮殷洪喬不能為人作致書郵

過采石

五侯鯖錄李白過采石江酒狂入水捉月而死

使高麗

宋呂惠公端使高麗渡江遇風濤檣折舟人大恐公怡然讀書若在齋閣時

扣舷而唱

隱逸傳晉賈充渡江謂夏統曰能作卿土地間曲乎統曰國人痛伍子胥忠烈為小海唱於是以足扣舷引聲清激風起晝暝衆皆恐懼充令妓女盛服金翠繞其舷三匝統若無聞充曰此吳兒木人石心也

扣舷而還

唐袁天綱字客師嘗渡江扣舟而還或問故曰船中人  
鼻下氣皆黑不可以濟俄有一男子跛而負就舟客師  
曰貴人在吾可以濟矣江中風起幾覆得免跛男子乃  
婁師德也

耒陽漂水

小說杜甫客耒陽一日過江舟中飲醉是夕江水暴漲  
甫為水所漂泛其屍不知落於何處玄宗思而不得詔

求之聶令乃積空土於江上曰子美為白酒牛炙脹飽  
而死元稹作甫墓誌謂甫扁舟下荆楚竟以寓卒旅殞  
岳陽其後遷柩偃師又韓退之題子美墓曰今春偶客  
耒陽路悽慘來尋江上墓招手借問牧牛兒牧兒指我  
祠堂處一堆空土烟蕪裏空使詩人悲嘆起怨聲千古  
寄西風寒骨一夜沈秋水當時處處多白酒牛炙如今  
家家有飲酒食肉皆如此何故常人無飽死捉月走入  
千尺波忠諫便沈汨羅底固知天意有所存三賢所歸

同一水過客留詩千百人千古醜聲竟誰洗明時好古  
嫉惡人應以我意知終始按小說所載人皆辨其誣觀  
韓詩又似真有其事矣未陽今隸衡州府

白口阻風

白居易白口阻風詩洪濤駭浪塞江津處處遭迴事事  
屯世上方為失途客江頭又作阻風人

陶侃投棋

晉陶侃都督荊州參佐或以戲廢事者乃取其蒲博棊

局之具悉投於江

榮老獻扇

冷齋夜話王榮老嘗宦於觀州欲渡觀江七日風作不得濟父老曰公篋中必蓄竒物此江神極靈當獻之得濟榮老有玉麈尾即以獻之風如故又以端硯獻之風愈作又以宣包虎帳獻之皆不驗夜臥念曰有黃魯直草書扇頭題韋應物詩曰獨憐幽草澗邊生上有黃鸝深樹鳴春潮帶雨晚來急野渡無人舟自橫公即取視

之恠况之際曰我猶不識鬼神識之乎持以獻之香火未收天水相照如兩鏡展對南風徐來一帆而濟

清白

清白江在成都新繁縣北宋趙抃過此曰吾志如此江清白雖萬類混淆其中不少濁也因名

混同

混同江在遼東源出長白山北流經五國城又北合松花江東注於海



色如鴨頭

唐書東夷列傳有馬訾水出靺鞨之白山色若鴨頭故名鴨綠江西南流至安市入海唐太宗征高麗耀兵於鴨綠水即此

源出龍鼻

四川保寧府有清漪江源出落叢山至龍鼻山合六溪水至彰明縣會於涪江

青龍

青龍江在松江府城北上接松江下通滬瀆吳孫權造  
青龍戰艦於此故名又吳江縣東南有白蜺江嘉定縣  
西南有白鶴江

白馬

白馬江在成都崇慶州東北源自晉源廢縣東入新津  
縣界

堯咨神護

翰府名談宋陳堯咨泊舟三山磯有老叟曰來日午後

有大風舟行必覆宜慎之來日天晴萬里無片雲舟人請解纜公曰更待之同行舟皆離岸公託以他事未行日午俄有黑雲起於天末大風暴至怒濤若山舟多沈溺公驚嘆又見前叟曰某實非人乃江之遊奕將也以公他日當作宰相固當奉告公曰何以報德叟曰貴人所至龍神理當衛護願得金光明經一部足矣公許之至京以金光明經三部遣人詣三山磯投之復夢前叟曰本期得一公賜以三當令公連陞數秩再拜而去

蘇頌孝感

宋蘇丞相頌知婺州沂桐江水暴迅舟橫欲覆魏國太夫人在舟中幾溺矣公哀號赴水救之舟忽自正太夫人甫出及岸舟乃覆衆以為誠孝所感

舟中私語

唐張柬之代楊元琰為荊州共乘船江中私語外家革命元琰悲涕慷慨志在王室後柬之執政引琰為羽林將軍謂曰江上之言君毋忘之

舟中危坐

程伊川貶涪州渡漢江中流船幾覆舟中人皆號哭伊  
川獨正襟危坐如常已而及岸同舟有父老問曰當船  
危時君獨無怖色何也伊川曰心存誠敬耳

色若黛玉

嘉陵江源出陝西鳳縣嘉陵谷經廣元昭化等州至四  
川保寧府其曰閬水巴水渝水漢水皆此江之異名杜  
甫詩嘉陵江色何所似石黛碧玉相因依正憐日破浪

花出更復春從沙際歸

水若玻瓈

玻瓈江在眉州墓頤山下即岷江也源出岷山瑩若玻瓈因名一名墓頤津即唐田令孜沈孟昭圖處

馬援觀鳶

容江在梧州府容縣南源出北流縣峩石鄉東過藤梧至廣東番禺縣入海漢馬援征蠻仰觀飛鳶跼跼墮水中即此江

謝端得螺

螺江在福州府城西北按搜神記閩人謝端於江邊得一螺大如斗畜之家端每歸盤餐必具因密伺之乃一姝甚麗問之答曰我天漢中白素女天帝遣我為君具飲食今當別去留殼與君端用以盛糧其米常滿江以此得名

錦江

成都記濯錦江秦丞相張儀所築蜀人以此水濯錦鮮

明故名錦江

繡江

繡江在梧州府藤縣東南源出廣東高州府雙威寨北流經容縣至此與藤江合為大江又桂林府有湘灘二江其源同出興安縣海陽山流至五里分為二南為灘水又名桂江漢討南粵戈船將軍出零陵下灘水即此流至二百里合癸水至桂林府城下合相思江入梧州界謂之湘水





山堂肆考卷二十

欽定四庫全書

山堂肆考卷二十一

明 彭大翼 撰

地理

河

說文河者下也隨地下流而通也河神曰水夷亦曰  
無夷即馮夷也馮夷以八月上庚日渡河溺歿天帝  
署為河伯又博物志馮夷潼鄉人得僊道化為河伯

瀆宗

穆天子傳河與江淮濟為四瀆河者四瀆之所宗也說苑四瀆何以視諸侯能蕩滌垢污焉能道百川於海焉能出雲雨千里焉為施甚大故視諸侯

水伯

孝經援神契黃河者水之伯上應天漢

導積石

夏書導河積石至於龍門南至於華陰東至於底柱又東至於孟津東過洛汭至於大伾北過泮水至於大陸

又北播為九河同為逆河入於海

出崑崙

水經注及山海經注河源出崑崙之墟東流潛行地下至規期山北流分為兩源一出葱嶺一出于闐其河復合東注蒲昌海

包砥柱

水經砥柱山名河水分流包山而過山見水中若柱然

冒石門

山海經積石之山下有石門河水冒以西南注云冒猶覆也

九折

淮南子曰河水九折注海而流不絕者有崑崙之輸也

八枝

漢世河決金隄議者欲求九河故迹而穿之未知其所以班固曰自茲距漢亡其八枝也

千年一清

拾遺記丹丘千年一燒黃河千年一清聖人之大瑞也  
羅隱詩莫把阿膠向北傾此中天意固難明解通銀漢  
應須曲纜出崑崙便不清高祖誓功衣帶小僊人占斗  
客槎輕三千年後知誰在何必勞君問太平

千里一曲

河圖河水出崑崙千里一曲九曲入海

三日而變

易乾鑿度天降嘉應河水先清三日清變為白白變為

赤赤變為玄玄變為黃各三日

三日不流

穀梁傳梁山崩壅河三日不流晉侯召伯尊伯尊遇輦者問焉輦者曰君親素縞帥羣臣哭之既而祠焉斯流矣伯尊至君問之伯尊如其言而河遂流

魚躍舟

本紀武王渡河中流白魚躍入王舟中

龍鬻水



河圖黃帝夢兩龍授圖乃齋詣河洛求之有大魚泛白  
圖泝流而上帝跪而受之又運斗樞舜以太尉即位與  
三公臨觀於河有黃龍五采負圖置帝前覺入水而去

禹疏

孟子禹疏九河滄濟漯而注諸海

穆祭

穆天子西征獵於澹澤獲白狐玄貉以祭河宗

出圖

禮運河出馬圖言龍馬負圖而出也

為崇

左哀六年楚昭王有疾卜河為崇大夫請祭王曰江漢  
睢漳楚之望也河非所獲罪也

子朝沈珪

穆天子傳王子朝用成周之寶珪沈於河乃自浮出津  
人得之河上陰不佞以溫人南侵拘得玉者取其玉將  
賣之則變為石王定而獻之與之東訾注云王定而獻

之言敬王定位不佞以珪來獻也

澹臺毀壁

水經注昔澹臺子羽齎千金之璧渡河陽侯波起兩蛟  
挾舟子羽曰吾可以義求不可以威劫操劍斬蛟蛟死  
波休乃投璧於河三投輒躍出乃毀璧而去示無恠意  
左僖二十四年晉文公及河子犯以璧授公子曰臣之  
罪甚多請由此亡公子曰所不與舅氏同心者有如白  
水投其璧於河

抱石沈

韓詩外傳申徒狄非世將自投於河崔嘉聞而止之曰  
吾聞聖人仁士之於天地間也民之父母也今為濡足  
之故不救溺人可乎申徒狄曰不然桀殺關龍逢紂殺  
王子比干而亡天下吳殺子胥陳殺洩冶而滅其國故  
亡國殘家非無聖智不用故也遂抱石而沈於河君子  
聞之曰廉矣如仁歟則吾未之見也

臨流嘆

魏志袁紹渡河祖授臨流而嘆曰上盈其志下矜其功  
悠悠黃河吾其濟乎

麾陽侯而渡

淮南子曰武王伐紂至孟津陽侯波起人馬不相見武  
王左操黃鉞右執白旄瞑目而麾曰余在天下誰敢害  
余者於是波息遂渡

傷鳴犢而還

家語孔子之晉及河聞趙簡子殺竇鳴犢及舜華乃臨

河而嘆曰美哉洋洋乎丘之不濟此命也子貢趨而進  
曰敢問何謂子曰竇鳴犢舜華賢大夫也而殺之丘聞  
之刳胎殺夭則麒麟不至其郊竭澤而漁則蛟龍不處  
其淵覆巢破卵則鳳凰不翔其邑何則君子諱傷其類  
也遂還

灌百川

莊子曰秋水時至百川灌河涇流之大兩涘涯渚之間  
不辨牛馬漢書成帝時河決潰金隄凡灌四郡河隄使

者王延世塞以竹落長四丈大九圍盛以小石兩船夾載而下之三十六日河隄成改元河平

潤九里

漢紀郭伋為潁川太守光武詔曰賢能太守去帝城不遠河潤九里冀京師并蒙其福

河上築宮

史記漢文帝時河決酸棗潰金隄武帝元封中河決瓠子天子臨河沈白馬玉璧令羣臣從官自將軍以下皆

負薪填決河取淇園之竹以為楫天子悼功之不成乃  
作瓠子之歌卒塞瓠子築宮其上名曰宣房宮而道河  
北行

河畔築堤

隋煬帝自板渚引河達於淮海謂之御河河畔築御堤  
以植柳

延年開嶺

漢武帝時齊人延年上書請令水工開大河上嶺出之



胡中東注之海則關東長無水災北邊不憂匈奴此功  
一成萬世大利上壯之

張騫窮源

漢書張騫使大夏窮河源惡覩所謂崑崙者乎

賈讓獻策

漢哀帝時賈讓奏治河三策徙其當水衝之人以避之  
放河使北入海泛濫朞月自定不勞人力謂之上策若  
多穿漕渠使人得以溉田謂之中策繕故隄勞費無已

此最下策也

鮑照為頌

宋元嘉中河濟俱清照為河清頌

王景賜書

水經注漢明帝永平中議治汴渠上引樂浪人王景問水形便因賜景山海經河渠書禹貢圖發卒數十萬詔景與將作謁者治渠防起自滎陽至於乘海口千餘里景商度地勢鑿山開澗隄遏衝要疏決壅積十里一門水

更相迴注無復潰漏之患明年渠成詔濱河郡國置河隄員吏如西京舊制

成公著賦

晉成公綏嘗著大河賦貫中夏之畿甸兮經朔狄之遐荒歷二周之北境兮流三晉之南鄉秦自西而啟壤兮齊據東而畫疆殷徒涉而永固衛遷濟而遂強趙決流而却魏嬴引溝而滅梁思先哲之攸歎何水德之難量

秦瑞

史記秦滅六國自以為獲水德之瑞更名河曰德水

魏寶

吳起為魏西河守武侯浮西河而下中流顧謂起曰美哉山河之固此魏國之寶也起曰在德不在險

竹箭流

慎子曰西河下龍門其流駛竹箭駟馬追之不及

桃花水

漢溝洫志河決而桃花水洋溢注云三月水漲名桃花

水

神魚舞河

漢紀宣帝詔東濟大河天氣清淨神魚舞河

偃鼠飲河

莊子曰偃鼠飲河不過滿腹

淮

釋名淮圍也圍繞揚州北界東至海也

會沂泗

夏書道淮自桐柏會於沂泗東入於海

出桐柏

山海經淮水出南陽平氏縣桐柏山其源初則湧出復潛流三十里然後長驚

貢珠魚

夏書淮夷貢蠙珠暨魚注曰蠙蚌之別名

出兵賦

唐第五琦曰兵賦之所出以江淮為淵

禹又

夏書淮沂其又注淮沂二水名徐之川莫大於淮淮又則自泗而下凡為川者可知矣徐之浸莫大於沂沂又則自沫而下凡為浸者可知矣又治也

名平

周宣王命名穆公平淮南之夷詩人美之作江漢詩

泗水下注

唐文粹呂周任泗州大水汜山泐桐柏發硤歛湧下注

淮漬

汴水入鬪

唐五行志中和三年汴水入於淮水鬪壞船數艘

橘化枳

周禮橘踰淮而為枳此地氣然也

雀為蜃

國語趙簡子嘆曰雀入淮為蜃龜鼃莫不變化唯人不能悲夫郭璞遊僊詩六龍安可頓運流有代謝淮海變



微禽吾生獨不化

舩艦渡淮

唐杜祐為徐州節度使張建封卒軍亂立其子愔請於朝帝不許詔祐節度淮泗討平之祐具舩艦遣將渡淮

鐵鎖絕淮

唐咸通中龐勛反圍城淮南節度使令狐綯遣牙將李湘屯淮口與郭本厚合為所敗由是援絕泗州刺史杜愔乃以鐵鎖絕淮流梯衝乘城

粵府

焦貢易林江河淮海天之粵府衆利所聚

都市

易林江河淮海天之都市商人受福國家富有

獲渦水神

古嶽瀆經禹治水三至桐柏山獲淮渦水神名曰無支祁形猶獼猴力踰九象人不可視乃命庚辰制之是時木魅水靈山妖水怪奔號叢繞幾以千數庚辰持戟逐

去遂鎖龜山之足淮水乃安

封長源王

五代楊溥二年正月封淮瀆為長源王

潛周鼎

楚詞潛周鼎於江淮兮注云言藏九鼎於江淮之中也

沈魏壁

魚豢魏略魏文帝黃初六年以舟軍入淮遣使者沈璧

於淮汜

韓鈞

水經淮水東經淮陰縣漢韓信嘗釣於此處

王浮

東漢王粲有浮淮賦從王師以南征兮浮淮水而遐逝

染指

宋徐仲車詩淮之水准之水春風吹春風洗青於藍綠  
染指魚不來鷗不起潏潏灑灑天盡頭祇見孤帆不見  
舟殘陽欲落未落處盡是人間古今愁可柰何可柰何

莫使騷人問棹歌我曹盡是浩歌客笑聲酒面春風和  
又馬子才長淮謠長淮之水青如苔行人但覺心眼開

損神

宋范文正公淮上遇風詩一棹危于葉傍觀欲損神他  
年在平地無忽險中人

擷芳吊水

隋徐彥伯淮亭吟擷瑤芳兮吊楚水弄琪樹兮歌越岑

沽酒聽歌

宋唐子方介謫官渡淮遇風舟欲覆作詩聖宋非狂楚  
清淮異汨羅平生仗忠信今日任風波舟楫顛危甚魚  
龍出沒多斜陽幸無事沽酒聽漁歌

濟

釋名濟者濟也言源出河北濟河而南也山海經濟  
水出河東郡垣曲縣王屋山初名沆水東出溫縣西  
北始名濟水禹貢所謂導沆水東流為濟入於河溢  
為滎是也注云泉源為沆流去為濟

達河

夏書浮於濟漂達於河注云舟行水曰浮充之貢賦浮濟浮漂達於河也帝都冀州三面距河達河則達帝都矣

注海

淮南子曰江出岷山河出崑崙淮出桐柏濟出王屋潁出少室漢出嶓冢分流外馳注於東海所行則異所歸則一

吳溝

趙睦吳越春秋吳王夫差興兵伐齊掘為深溝通於齊魯之間北屬之濟

齊阻

戰國策張儀說齊王曰齊據濟足以為阻

通百川

見河瀆宗

紀一方



通典祭大濟文播通四氣作紀一方

鬪水

戴延之西征記濟水自大坯入河與河水鬪而東流

截流

孔安國注濟水入河並流數千里而截河又並河數里

溢為榮澤

馮征

馮衍明志賦流山岳而周覽徇碣石與洞庭浮江河而

入海沂淮濟而上征

素汎

素宏北征賦背梁山截汶波汎清濟傍祝阿

獨尊

唐太宗問許敬宗曰天下洪流巨谷不載祀典濟甚細而在四瀆何也對曰瀆之為言獨也不因餘水獨能赴海者也濟潛流屢絕狀雖微細獨而尊也帝曰善

同靈

唐李甘濟為瀆問今盡濟水之力載數石之舟廣不能  
橫深不能浮而曰與河同靈等秩吾不知先王班祀之  
意何如也

宜麥

淮南子曰濟水通和宜麥

沒蒿

杜甫苦雨詩濟上沒蓬蒿

漢

漢水源出隴西郡嶓冢山由漢中府流經鄖縣及均州光化縣至襄陽府城北又東南宜城縣抵安陸州至大別山入江其水因地而名曰漾曰沔曰漢曰滄浪總名之為漢漢水多生瘰又生粗脰其樹木亦多瘰大抵水土使然按說先儒皆疑漢沔為一今考二水源流不同漢水即禹貢嶓冢導漾東流為漢是也沔水即書疏沔水下尾與漢合流乃入江是也

朝海

夏書江漢朝宗於海

鬪江

水經自沔與江合流東過彭蠡澤注云漢與江鬪轉東成澤

膠舟

周昭王南征至漢舟人膠其舟王遂溺死

亡劍

水經襄陽故城北枕沔水昔張公遇害亡劍於此

楚望

見河為崇

荆川

周禮正南曰荆州其川江漢其浸潁湛

沈玉

左定三年蔡昭侯為兩佩與兩裘以如楚獻一佩一裘於昭王昭王服之以享蔡侯蔡亦服其一子常欲之不與三年止之後蔡侯歸及漢執玉而沈曰余所有濟漢

而南者有如大川蔡侯如晉以其子元與其大夫之子  
為質而請伐楚

含珠

盛弘之荊州記荆蘊玉以潤其區漢含珠而清其域張  
衡南都賦耕父揚光於清泠之水游女弄珠於漢臯之  
曲

對月谷

水經漢水右對月谷山

配天漢

蔡邕漢津賦配名位於天漢兮披厚土而載形發源自  
乎嶓冢兮引瀆澧而東征

築隄障害

唐會昌中漢水害襄陽拜盧鈞為山南東道節度更築  
堤六十里以障漢鈞字子和

為堤遏湍

唐張柬之刺襄州會漢水漲蓄城郭東之因壘為隄以



過湍怒

六師俱喪

周昭王十九年天大曠雉兔皆震喪六師於漢三十六年伐楚涉漢遇大兕

七軍皆沒

蜀關公攻樊時漢水溢于禁等七軍皆沒

善夷責神

唐文粹李善夷過漢水見波濤而責之以辭曰漢之廣

兮風波四起雖有風波不如蹄涔之水蹄涔之水不為  
下國而傾天子漢之深兮其隄莫量雖曰莫量不如行  
潦之汪行潦之汪不為下國而溺君王漢之美者曰魴  
吾雖饑不食其魴恐污吾之饑腸

交甫遇女

見江

潛璽

蜀少府王謀等上言前襄陽男子張素王休獻玉璽璽

潛漢水其光徹天

出鐘

宋書漢中固城縣漢水岍際有異聲如雷俄頃崩有  
銅鐘十二出自潛壤體制既精扣之清亮

沈碑紀功

水經沔水東經萬山山下有潭昔晉杜預南征紀功勒  
為二碑一立萬山上一沈萬山下潭中曰千載之下何  
知深谷不為陵乎萬山在襄陽府西十里舊與南郡鄧

縣分界唐鮑溶詩襄陽太守沈碑意身後身前幾年事  
漢江千古未為陵水底魚龍應識字

揮劍除害

荊州記沔水隈潭極深先有蛟為害鄧遐為襄陽太守  
拔劍入水蛟繞其足遐自揮劍截蛟數段流血水丹蛟  
患遂息

洛

春秋說題辭洛之為言繹也言水繹繹光耀也魚豢

畧初漢為火行火忌水故洛字去水而加佳魏為土  
行土水之母水得土而流土得水而柔故雒字去佳  
而加水易乾鑿度盛德之應洛水先溫九日乃寒五  
日變為五色玄黃

### 出冢嶺

夏書導洛自熊耳東北會於澗瀍又東會於伊又東北  
入於河注云熊耳盧氏之熊耳也洛水出冢嶺山禹只  
自熊耳導之耳

出獵山

淮南子曰洛水出獵山

鳳歌

沈約宋書黃帝齋於中宮坐於玄扈洛水之上有鳳凰  
集不食生蟲不履生草其雄自歌其雌自舞銜圖置帝  
前圖以黃金為匣

犬吠

李白贈武十七詩秋犬吠清洛天津成塞垣

龍見

易乾卦帝王始興河洛龍見

魚流

帝王世紀黃帝時大霧三日帝遊於洛水之上見大魚  
因殺五牲以醮之天乃甚雨七日七夜魚流而得圖書  
今河圖視萌篇是也

赤光起

尚書中候堯率羣臣東沈璧於洛退至於下稷赤光起

靈龜負書出赤文成字

青雲浮

尚書中候武王觀於河沈璧禮畢且退至於日昧榮光  
塞河青雲浮洛赤龍臨壇銜玄甲之圖吐之而去

沈璧

帝王世紀湯時有神牽白狼銜鈎入殷朝者乃東觀沈  
璧於洛獲黃魚黑王之瑞於是始受命稱王

吞珠



帝王世紀漢高祖母昭靈后名含始遊於洛池有玉雞銜珠刻曰吞此者王含始吞之而生高祖

青鯉

河圖黃帝遊洛水見鯉魚長三丈身青無鱗赤文成字

玄龜

沈約宋書玄龜洛書者天符也王者德至川泉則洛出龜書

周公卜

周書我乃卜澗水東瀍水西惟洛食我又卜瀍水東亦  
惟洛食

子晉遊

王子晉好吹笙作鳳鳴常遊伊洛遂得僊

三川震

史記周幽王二年西周三川皆震伯陽父曰昔伊洛竭  
而夏亡河竭而商亡今周德若二代之季矣山崩川竭  
亡之徵也徐廣曰三川涇渭洛也

二水鬪

國語周靈王二十二年穀洛二水鬪將毀王宮王欲壅之太子晉曰晉聞古之長民者不墮山不崇數不防川不寶澤是以民生有財用而死有所葬王不聽卒壅之及景王多寵人亂於是始生注云鬪者兩水相格似鬪也毀王宮者洛在王城之南穀在王城之北靈王時穀水盡出於王城之西南流合於洛水毀王城西南將及王宮也

流玉

山海經秦冒之山洛水出焉東流注於河其中有藻玉

墜鐘

孫嵩宋書高祖平關洛致鐘簠舊器南還一大鐘墜洛

水

居涑作賦

潘岳閒居賦退而閒居于洛之涑

巡堤詠詩

唐劉禹錫嘉話高宗時天下無事上官儀獨持國柄常  
凌晨赴朝巡洛水隄步月緩轡詠詩音韻清亮望之若  
僊其詩曰脈脈廣川流驅馬歷長洲鵲飛山月曉蟬噪  
野風秋

適之修防

唐玄宗患洛水歲暴耗徭力詔李適之以禁錢作三大  
防日上陽曰積翠曰月陂自是水不能為患

昭德繕橋

初洛有二橋司農卿韋弘機徙其一置長夏門人皆利  
之然洛水歲涇蓄之繕者告勞李昭德始累石代柱銳  
其前使殺暴濤水不能怒自是無患

宜禾

淮南子曰洛水輕利宜禾

有石

述征記洛水底有礮石故上無冰

渭

春秋說題辭渭之為言布也渭渭流行貌雜兵志東海出氣如鼈渭水出氣如蜃

導同穴

夏書導渭自鳥鼠同穴東會於澧又東會於涇又東過漆沮入於河河圖鳥鼠同穴山地之幹也渭水出其中

浸雍州

周禮雍州其浸曰渭洛

迎太姒

詩大雅大邦有子倪天之妹文定厥祥親迎於渭

遇太公

史記太公望者東海上人以漁釣奸周西伯西伯將獵  
卜曰所獲非龍非虜非熊非羆非羆霸王之輔於是西伯獵  
果遇太公於渭水之陽與語大悅載與俱歸

水貫天漢

三輔記秦作離宮於渭南北渭水貫都以象天漢橫橋  
南渡以法牽牛橫橋即中渭橋也在西安府西北三輔



舊事漢都渭南開北闕以臨渭

祀比大川

沈約宋書秦漢都西京涇渭雖不在祀典以其近咸陽故皆得比大川之祀

出周鼎

史記漢文帝十五年趙人新垣平以望氣見上說上立渭陽五帝廟曰周鼎亡在泗水中今河溢通泗臣望東北汾陰直有金寶氣意周鼎其出乎兆見不迎則不至

於是上使治廟汾陰祀以出鼎

得燕璽

王景暉南燕書姚秦皇初三年歲在丁酉於長安渭濱  
得赤璽上有文字曰天命燕德

投錢

三輔決錄安陵清者項仲山飲馬渭水每投三錢

出椀

酉陽雜俎景龍寺前街中舊有巨井俗呼為八角井元

和初有公主夏中過之令從婢以銀稜椀就井承水悞墜椀於井經月餘此椀出於渭河

### 漢武造橋

東渭橋在西安府東北漢高祖造以通櫟陽之道西渭橋在西安府西北故長安城西漢武帝造跨渭水以通茂陵以其對便門故亦名便橋唐時名咸陽橋

### 符健設壇

裴景仁符書符健至長安賈玄等上尊號依舊儀立百

官設壇城南渭水之陽

趙屯

漢趙充國屯田于渭濱

馮耕

馮衍賦序馮子耕於驪山之阿渭水之陰廢弔問之禮  
絕游宦之路眇然有超物之心無偶俗之志

乘輿馬驚

漢張釋之為廷尉文帝出中渭橋有一人從橋下走出

乘輿馬驚使騎捕屬廷尉釋之奏此人犯蹕當罰金

### 帝閑馬化

柳宗元龍馬贊明皇在位靈昌郡得異馬於河其狀龍鱗虺尾拳毛環目肉鬣居帝閑二十年遇祿山亂帝西幸至咸陽西入渭水化為龍游泳而去不知所終

### 渭橋女星

陳壽益部耆舊傳漢武時張寬為侍中從祀甘泉至渭橋有女子浴於渭水乳長七尺上怪問之女曰後第七

車侍中知我所來時寬在第七車對曰天星主祭祀者齋戒不潔則女人星見一統志所載女子浴於涇河

渭橋道術

葛洪神僊傳駙馬都尉北海巫炎字子都漢武帝出巡子都見於渭橋上上見炎頭上鬱鬱有紫氣高丈餘名東方朔使相此君有何道術對曰此君有陰道之術

龍飲

辛氏三秦記龍首山長六十里頭入渭水尾達樊川高

二十丈昔有黑龍從南山出飲渭水其行道因成土山  
名龍首

雞翔

裴景仁苻書苻健皇始四年冬山雞來入人家栖宿養  
子而去又羣聚傍渭水游翔與家雞無異

觀蛙

唐志神龍中渭水有蛙大如鼎里人聚觀數月而失

抱馬

安祿山反王師敗績僕固懷恩至渭水無舟抱馬鬣以逸

水赤

漢書昔三代居三河而河洛出圖書秦居渭陽而渭水數赤瑞異應德之效也

性清

後周宇文道至渭源詩曰合流應不雜方知性本清

涇



關中記涇與渭洛為關中三川與渭灞滻澇澧澇  
為關中八水辛氏三秦記及山海經注涇水出安定  
郡涇陽縣西開頭山東南經新平扶風至京兆高陵  
縣而入渭與渭水合流三百里清濁不相雜詩國風  
涇以渭濁

引水為渠

漢武時趙中大夫白公奏穿渠引涇水首起谷口尾入  
櫟陽注渭中二百里溉田四千五百頃名白渠人得其

饒

卜水為祟

史記秦二世夢白虎噬其左驂馬殺之心不樂怪問占  
夢卜曰涇水為祟二世乃齋於望夷宮祀之沈四白馬  
於涇水

毒置上流

左襄十四年晉侯伐秦濟涇而次秦人毒上流師人多  
死

祀北大川

見渭

富流

李庾西都賦其地勢也帶涇渭之富流

穢跡

柳子愚溪序秦有水掎汨泥淖撓混沙礫乃合清渭自  
彰穢跡故名曰濁涇

山崩水涸

淮南子曰碯山崩而薄洛之水涸高誘注碯山在雍薄洛之水涇水也蓋涇水出薄洛山故耳

岸積流壅

漢武帝河平四年長陵臨涇岸積壅涇流

請開支渠

唐黎幹戎州人大曆十三年涇水擁隔請開鄭白支河復秦漢故道以溉田民廢碾碓八十餘所

命刮朽壤

唐王維作張公德政碑惟涇失防比歲多決近縣疲於  
奔役他山苦於度材公命刮朽壤填巨石民受其利

胡盧河

胡盧河本名蔚茹河源出平涼府鎮原縣西南頽沙山  
下流入涇河

騰脂川

川在平涼府華縣西北一百里東流入涇河

乾  
坤  
大  
學  
章  
句

山堂肆考卷二十一